

بسم الله تبارك وتعالى  
قصة بداية العالم  
سفر التكوين  
الفصل ستة إلى الفصل أحد عشر

## بداية العالم

### النبى نوح يستعد للطوفان

<sup>1</sup>والين ابداءو البشر يكثر و فلارض وخلقولهم امنات، <sup>2</sup>شافو الملائكة اعلن امنات البشر ازوينات و كبطوهم و اتعرسو امعاهم كيف ما ابغاو. <sup>3</sup>و كمال الله تعالى: روجي ما بيكا فلإنسان الزمن كامل بيهلي هو إنسان فاني ومن ظرك ماهو لاهي يعيش أكثر من 120 سنة. <sup>4</sup>ومن ذاك الوقت عاد فلارض لجبابرة بيهلي الملائكة اتعرسو امع امنات البشر وجبرو منهم أولاد. وكانو أولادهم هو ما لجبابرة اللي معروفين بالحرب من ذاك الزمن. <sup>5</sup>و عاكب ذاك شاف الله تعالى اعلن شر لإنسان انزاد حته فلارض، و اعلن رغبات لإنسان وافكار كلبو كاملين دائما ماهم امسكمين. <sup>6</sup>واتكدر الله تعالى حته فكلبو اعلنو خلقك لإنسان فلارض. <sup>7</sup>و كمال الله تعالى: لاهي انفرق البشر اللي خلقتهم من اعلى لارض، الناس امع الحيوان والمخلوقات اللي يزحفو اعلى اكروشتهم والطيور السما بيلى اتندمت اعلي خلقتهم. <sup>8</sup> يغير النبي نوح ارضا اعليه الله تعالى.

<sup>9</sup>وهادي هي قصة النبي نوح: هو كان آر كاج صالح ومتقي مولانا من امبين أهل جيلو، ويعدل كل شي طلبو منو مولانا. <sup>10</sup> واجبر اثلت أولاد هو ما سام وحام ويافت.

<sup>11</sup>عادت لارض فاسدة عند مولانا وعاد فيها الظلم وشر لإنسان. <sup>12</sup> والين شاف مولانا هاذا الفساد اللي خسر حياة كل البشر، <sup>13</sup> كمال مولانا للنبي نوح: جات نهاية هاذا الزمن، و لاهي انفرق البشر كاملين من الوجود بيهلي بسببهم امتلات لارض من الظلم. لاهي انبيدهم وانبيد لارض امعاهم. <sup>14</sup> و عدل لراصك سفينة من لعمد لمتان، وابني فيها ابوت و ادهنها بالطين من الكدام ومن النجر اياك الما ما يدخل فيها. <sup>15</sup> وتبينها بهادي الطريقة: طول السفينة يعود 150 ميتر، وعرضها يعود 25 ميتر، وطولها اعلى الفوك يعود 15

ميتراً. <sup>16</sup> واتعدل فيها مغطاية يعود امبينها امع السفينة 50 سانتيمتر، واتعدل فيها باب، واتعدل فيها ثلاثة طوابق، التحتاني والوسطاني والفوقاني. <sup>17</sup> بيلى راعيني لاهي انمشي طوفان اعلى لارض اياك انفرق كل مخلوق حي تحت السما. وكل شي اعلى لارض لاهي يهلك. <sup>18</sup> يغير لاهي انعدل عهدي امعاك وتدخل السفينة انتا وأولادك وأعيالك واعليات أولادك امعاك. <sup>19</sup> وتكبيظ امعاك فالسفينة 2 من كل مخلوق اذكر ونيثي اياك يسلكو امعاك: <sup>20</sup> أثنين من كل نوع من الطيور ومن كل نوع من الحيوانات ومن كل نوع الحيوانات اللي يزحفو اعلى اكر وشتهم اياك يحياو. <sup>21</sup> واكبيظ امعاك كل شي ينتكل واتخزنو اياك يعودلهم ويعودلك الطعام. <sup>22</sup> وعدل النبي نوح كل شي اطلب مولانا منو.

## بداية العالم

مولانا يسألك النبي نوح وعائلتو من الطوفان

<sup>1</sup>ومن فم كمال الله تعالى للنبي نوح: ادخل فالسفينة انتا وكل أسرتك، بيّلي اجبرتك وحدك صالح فهذا الجيل. <sup>2</sup>واكبظ امعاك من كل نوع من الحيوانات لحلال اسبع اذكور واسبع ناثي، والحيوانات اللي ماهم احلال تكبظ من كل نوع أثنين من الذكور وأثنين من الناثي. <sup>3</sup>واملي تكبظ من كل نوع من الطيور اسبع اذكور واسبع ناثي اياك بيكا جنسهم اعلى لارض. <sup>4</sup>بيّلي عاكب اسبعة أيام لاهي انمشي اسحاب اعلى لارض، ولاهي اتم ماشة مدة 40 يوم قليل وانهار، اياك انفرق كل مخلوق حي كط خلكتو من اعلى لارض. <sup>5</sup>وعدل النبي نوح كل شي اطلب منو الله تعالى. <sup>6</sup>وكان النبي نوح فهذا الوقت عندو 600 سنة وقت امجي طوفان اعلى لارض. <sup>7</sup>وادخل النبي نوح فالسفينة هو وأولادو وأعيالو واعليات أولادو اياك يسلكو من ما الطوفان. <sup>8</sup>ودخلو املي الحيوانات لحلال والحيوانات اللي ماهم احلال والطيور والحيوانات اللي يزحفو اعلى اكروشتهم. <sup>9</sup>وجاو للنبي نوح ودخلو فالسفينة اعلى شكل أزواج اذكر ونيثي كيف ما اطلب مولانا من النبي نوح. <sup>10</sup>وعاكب اسبعة أيام جا الطوفان اعلى لارض. <sup>11</sup>فسنة 600 من حياة نوح فالشهر الثاني فاليوم 17 من الشهر، انفجرت المياه اللي كانت عميقة فالتراب وانفتحو ابواب السما. <sup>12</sup>ونزلت اسحاب اعلى لارض قليل وانهار مدة 40 يوم. <sup>13</sup>وفذاك اليوم نفسو ادخل النبي نوح فالسفينة هو وأولادو، سام وحام ويافت وأعيال نوح واعليات أولادو الثلاثة. <sup>14</sup>وكان امعاهم من كل نوع من حيوانات لخلا والحيوانات اللي يُربّاو والحيوانات اللي يزحفو اعلى اكروشتهم والطيور. <sup>15</sup>من كل المخلوقات الحيين جاو للنبي نوح ودخلو فالسفينة اعلى شكل أزواج <sup>16</sup>اذكر ونيثي من كل مخلوق كيف ما اطلب مولانا من النبي نوح. وعاكب ذاك اكفل الله تعالى

## باب السفينة.

<sup>17</sup> وواصل الطوفان مشيه اعلى لارض مدة 40 يوم، وركب ما الطوفان السفينة فوك لارض. <sup>18</sup> وكانت المياه الياسرة اتواصل مشيها اعلى لارض والسفينة ماشة فوك الماء. <sup>19</sup> وانزادت المياه حته يلين غطات لكدا لكبار كاملين اللي تحت السما. <sup>20</sup> وواصلت المياه مشيها يلين الحك طولها اعلى الفوك اسبع امتار فوك لكدا لكبار. <sup>21</sup> وماتو كل المخلوقات الحيين اللي كانو موجودين اعلى لارض من الطيور وحيوانات لخلا والحيوانات اللي يُربّو والزواحف والبشر. <sup>22</sup> ومات كل مخلوق حي يتنفس اعلى لارض. <sup>23</sup> وفرق مولانا من اعلى سطح لارض كل مخلوق اسوا من البشر والحيوانات والزواحف واطيور السماء، كاملين فرقو من لارض ولا ابكا ماهو نوح واللي امعاه فالسفينة. <sup>24</sup> وابكات المياه موجودة اعلى لارض مدة 150 يوم.

## بداية العالم

القربان اللي كچدم النبي نوح عاكب يلين وكچف الطوفان

<sup>1</sup>ولا انسا مولانا النبي نوح وكل حيوانات لخلا والحيوانات اللي يُربّاو اللي امعاه فالسفينة، ومشّا الريح اعلى لارض وبدات لارض اتمص الماء. <sup>2</sup>وكانت عين الماء لكبيرة اللي عميقة فالتراب انكفلت وابواب السما انكفلو، ووكچفت اسحاب الجاية من السما. <sup>3</sup>واتراجعت المياه عن لارض اشوي اشوي. وعاكب 150 يوم، <sup>4</sup>فاليوم 17 من الشهر السابع، وكچفت السفينة اعلى اكدا أراراط. <sup>5</sup>وظلت المياه تنتكص يلين الشهر العاشر. وفاليوم لأول من الشهر العاشر ظهور روس لكدا.

<sup>6</sup>وعاكب 40 يوم افتح النبي نوح الكوة اللي عدل فالسفينة. <sup>7</sup>ومشّا اغراب واتم طائر فوك لارض يلين بدات المياه تيبس عن لارض. <sup>8</sup>وعاكب ذاك مشّا النبي نوح احمامة اياك يشوف إلى عادت المياه يبست عن لارض. <sup>9</sup>ولا اجبرت لحمامة ابليدة تنزل فيها بيهلي المياه مزالت امغطية لارض كاملة. ورجعت لحمامة شور النبي نوح فالسفينة. ومد ايدو واحكمها ودخلها شورو فالسفينة. <sup>10</sup>وحانا اسبعة أيام اخرين ومشّا لحمامة من السفينة مرة اخرا. <sup>11</sup>ورجعت شورو امع اغروب الشمس رافدة فخشمتها وركبة من صدراية الزيتون اجديدة. وافهم النبي نوح اعلن المياه مصتها لارض. <sup>12</sup>وحانا اسبعة أيام اخرين وبعدين مشّا لحمامة ولا رجعتلو هاذي المرة.

<sup>13</sup>وفاليوم لأول من الشهر لأول من سنة 601 من حياة النبي نوح، فهذا الوقت كانت المياه بدات تيبس عن لارض. وارفع النبي نوح مغطية السفينة وشاف اعلن لارض تيبس حته. <sup>14</sup>وفاليوم 27 من الشهر الثاني يبست لارض تماما. <sup>15</sup>وكلم مولانا النبي نوح وكالو: <sup>16</sup>اوخط من السفينة انتا وأعيالك وأولادك واعليات أولادك. <sup>17</sup>وخط كل نوع من المخلوقات الحيين اللي امعاك، من الطيور والحيوانات والزواحف اياك يتوالدو فلارض

ويكثر<sup>18</sup>. وخاظ النبي نوح وأولادو وأعيالو وأعليات أولادو  
<sup>19</sup>والحيوانات والزواحف والطيور والمخلوقات التي يتحركو أعلى لارض  
خاظو كاملين من السفينة بأنواعهم.  
<sup>20</sup>وابنا النبي نوح مذبج لله تعالى واكبط واحد من كل الحيوانات لحلال  
والطيور لحلال واذبجهم وكدمهم لله تعالى كيفت قربان محروك أعلى  
المذبج<sup>21</sup>. واكبلهم الله تعالى وارضا وكمال الله تعالى امبينو امع راصو: ماني  
لاهي نلعن لارض مرة اخرا بسبب لإنسان امع اعلن ميول كلبو شرير من  
صغرو. ولاني لاهي نكتل كل مخلوق حي مرة اخرا كيف ما عدلت.  
<sup>22</sup>ومادامت لارض موجودة لاهي يعودو فيها مواسم لحرية والحصاد،  
البرد والحرمان والصيف والشتا والنهار والليل. ولاهي يتم هاذا هو حالها إلى  
الأبد.

## بداية العالم

بداية العهد امبين مولانا والبشر عاكب الطوفان

<sup>1</sup>وبارك مولانا النبي نوح وأولادو وكمالهم: اثمرو واكثارو واملاو لارض.  
<sup>2</sup>حيوانات لخلا اللي فلارض واطيور السما والزواحف وحت لبحر كاملين  
 لاهي يخافو منكم ويرهبوكم، بيهلي مولانا اعطاكم السلطة اعليهم. <sup>3</sup>وكيف  
 ما اعطيتكم الصدر لخطر كيفت اطعام لكم، ظرك عاطيكم الحيوانات. <sup>4</sup>يغير  
 لا توكلو أي لحم مزال الدم فيه بيهلي الدم هوا اللي يمثل الحياة. <sup>5</sup>يغير دمكم  
 انتوما لاهي انعاقب اعليه كل حيوان سفكو، واملي كل إنسان لاهي نكتلو  
 اعلى حياة خوه لإنسان بيهلي هو كيفتو. <sup>6</sup>ومن يسفك الدم لإنسان لاهي  
 ينسفك دمو، بيهلي مولانا خلق لإنسان اعلى شي من صيفاتو. <sup>7</sup>يغير انتوما  
 اثمرو واكثارو فلارض. <sup>8</sup>وكلم مولانا النبي نوح وامعاه أولادو وكمالو: <sup>9</sup>أنا  
 ظرك لاهي انعدل عهدي امعكم وامع نسلكم اللي جاي اوراكم. <sup>10</sup>وامع كل  
 مخلوق حي امعكم من الطيور والحيوانات اللي يُربأو وكل حيوانات لخلا،  
 وكل اللي خاظ من السفينة وكل مخلوق حي اعلى لارض. <sup>11</sup>ولاهي انعدل  
 عهدي امعكم ولا تيت لاهي نسمح باعلن اتفرق مياه الطوفان كل مخلوق  
 حي مرة اخرا، ولا تيت لاهي نسمح باعلن الطوفان يجي ويخسر لارض  
 مرة اخرا.

<sup>12</sup>وكال مولانا: هاذي هي علامة العهد اللي لاهي انعدل بيني وبينكم وكل  
 مخلوق حي امعكم فكل لاجيال، <sup>13</sup>لاهي اندير خط الندية فالسما ويعود  
 علامة العهد امبيني وامبين لارض. <sup>14</sup>والين انمشي السحاب فوك لارض  
 ويظهر خط الندية فالسما، <sup>15</sup>نتذكر العهد اللي امبيني وبينكم وامع كل نوع  
 من مخلوق حي، ولا تتحول المياه شور طوفان يهلك كل مخلوق حي.  
<sup>16</sup>والين يظهر خط الندية فالسما لاهي انشوفو ونتذكر العهد اللي لاهي يدوم  
 إلى الأبد امبيني وامبين المخلوقات الحية كاملين اللي اعلى لارض. <sup>17</sup>وكال

مولانا للنبي نوح: هادي هي علامة العهد اللي عدلتو امع كل مخلوق حي اعلى لارض.

<sup>18</sup> هادو هو ما اولاد نوح اللي خاظو من السفينة: سام وحام ويافت. وحام هو بو كنعان. <sup>19</sup> هو ما اولاد النبي نوح الثلاثة ونسلهم هو اللي انتشر فكل جيهات لارض.

<sup>20</sup> واشتغل النبي نوح فلحريثة واحرث اصدر العنب اللي يُعدل منو عصير العنب. <sup>21</sup> واشرب من عصير العنب واسكر واتعرا فخيمتو. <sup>22</sup> وشاف حام بو كنعان عورة بوه وامشا وعلم اخوتو. <sup>23</sup> واكبطو سام ويافت حولي وداروه اعلى اکتافهم ودخلو شور بوهم النبي نوح فالخيمتو، وهو ما كانو ماشين اعلى لورا وسترو عورة بوهم. وكانو وجوهتهم صادين اعلى الجيهة لخر اياك ما يشوفو عورة بوهم. <sup>24</sup> والين او عا النبي نوح من سكر واعرّف اللي عدلو ولو الصغير، <sup>25</sup> كمال: ملعون كنعان ولاهي يعود أحقر من اعبيد اخوتو. <sup>26</sup> وكال املي: يا ربي وإلهي بارك سام واجعل كنعان عبد لو. <sup>27</sup> ووسع حدود يافت، ويسكن فاخيام سام ويعود كنعان عبد لو. <sup>28</sup> وعاش النبي نوح عاكب الطوفان 350 سنة. <sup>29</sup> والين اتوفا النبي نوح كان عندو 950 سنة.

## بداية العالم

### أمم العالم

<sup>1</sup>هاذي لاحة سجل أولاد سام وحام ويافت أولاد النبي نوح، اللي خلجولهم عاكب الطوفان. <sup>2</sup>أولاد يافت هو ما جومر وماجوج وماداي وياوان وتوبال وماشك وتيراس. <sup>3</sup>وأولاد جومر هو ما أشكناز وريفات وتوجرمة. <sup>4</sup>وأولاد ياوان هو ما أليشة وترشيش وكتيم ورودانيم. <sup>5</sup>ومنهم اتفرعو الناس من قريات اللي اعلى حاشية لبحر اعلى حسب قبائلهم وشعوبهم ولغاتهم. <sup>6</sup>وأولاد حام هو ما كوش ومصرايم وفوط وكنعان. <sup>7</sup>وأولاد كوش هو ما سبا وحويلة وسبته ورعمة وسبتكا. وأولاد رعمة هو ما شبا وددان. <sup>8</sup>وكوش اجبر ول اسمو نمروود اللي عاد محارب امتين فلارض. <sup>9</sup>وكان صياد مانع بفضل الله تعالى. ولذا السبب يكلو المثل: كيفت نمروود هو صياد امتين بفضل الله تعالى. <sup>10</sup>وتكونت مملكتو فلأول من مدن بابل وأرك وأكد وكننة فارض شنعار. <sup>11</sup>وعاكب ذاك هاجر شور أشور وابنا مدن نينوى ورحوبوت عير وكالغ <sup>12</sup>ورسن اللي هي مدينة اكبيرة امبين نينوى وكالغ. <sup>13</sup>ومصرايم اجبر قبائل لود وغانم ولهاب وفتوح <sup>14</sup>وفتروس وكفتور وكسلوح، ومن كسلوح جاو الفلشطييين. <sup>15</sup>وكنعان اجبر اطفيل اسمو صيدون وهو بكر وبعدين اجبر حثا، <sup>16</sup>وكنعان هو املي بو اليبوسيين ولأموريين والجرجاشيين <sup>17</sup>والحويين والعرقيين والسنيين <sup>18</sup>ولأرواديين والصماريين والحمانيين. وعاكب ذاك اتفرعو افخاظ قبائل الكنعانيين. <sup>19</sup>وامتدو حدود كنعان من صيدون يلين غزة واخظين من جرار، واورا ذاك شور لاشع واخظين من سدوم وعمورة وأدمة وصبويم. <sup>20</sup>وهانو كاملين هو ما أولاد حام اعلى حسب قبائلهم ولغاتهم وشعوبهم وبلدانهم. <sup>21</sup>وسام هو خو يافت لكبير وهو املي اجبر أولاد وهو جد أولاد عابر

كاملين.<sup>22</sup> أولاد سام هوما عيلام وأشور وأرفكشاد ولود وأرام.<sup>23</sup> وأولاد  
أرام هوما عوص وحول وجائر وماش.<sup>24</sup> وأرفكشاد اجبر شالح وشالح اجبر  
عابر.<sup>25</sup> وعابر اجبر اطفالين لأول منهم اسمو فالق وهو اللي فأيامو انقسمت  
لارض. واسم خوه الثاني هو يقطان.<sup>26</sup> ويقطان اجبر أولاد هوما الموداد  
وشالف وحضرموت ويارح<sup>27</sup> وهدورام وأوزال ودقلة<sup>28</sup> وعوبال وأبيمايل  
وشبا<sup>29</sup> وأوفير وحويلة ويوباب. وهادو كاملين هوما أولاد يقطان.<sup>30</sup> وكانو  
ساكنين فاراضي لكدا اللي فالشرق اللي امبين ميشع وسفار.<sup>31</sup> وهادو كاملين  
هوما أولاد سام حسب قبائلهم ولغاتهم وبلدانهم وشعوبهم.<sup>32</sup> وهادو هوما  
قبائل أولاد النبي نوح حسب انسابهم وشعوبهم ومنهم اتفركو الشعوب  
فلارض عاكب الطوفان.

## بداية العالم

### اخلاية لغات العالم

سلسلة نسب النبي نوح يلين النبي أبرام

<sup>1</sup> وكانت الناس كاملة اللي فلارض تتكلم بلغة وحدة ويستخدمو كلمات يعرفوهم كاملين. <sup>2</sup> واخلك اعلن يلين رحلت الناس شور الشرق جبرو واد فارض شنعار واتسعو فيه. <sup>3</sup> وكالو امبيناتهم: وهاو نكبظو الطوب ونشووه بالنار. واستخدمو الطوب بل لحجار ونوع من الطين لمتين بل الطين العادي. <sup>4</sup> وكالو: وهاو نبو لروصنا مدينة وبرج يوصل طولو للسما ونعطو لروصنا هوية اياك ما نتفركو فكل جهات لارض. <sup>5</sup> وانزل الله تعالى اياك يشوف لمدينة والبرج اللي كانو الناس بينوهم. <sup>6</sup> وكال الله تعالى: يلين عادو وهو ما شعب واحد ويتكلمو بلغة وحدة، بداو يعدلو هاذا، ما هو لاهي يصعاب اعليهم يعدلو أي شي اوخر ينواو يعدلوهم. <sup>7</sup> ننزلو اصا وانخلطو لغتهم اياك كلهم ما يفهم لغة لوخر. <sup>8</sup> وشتتهم الله تعالى من فم فلارض كاملة ووكفو عن بناء لمدينة. <sup>9</sup> ولذا السبب أسمات لمدينة بابل اللي معناها الله تعالى خلط لغة العالم كامل. ومن فم شنتهم الله تعالى فكل جهات لارض.

<sup>10</sup> وهاذي لاحة سجل أولاد سام: يلين عاد سام عندو 100 سنة اجبر أرفكشاد عاكب الطوفان بسنتين. <sup>11</sup> وعاش سام عاكب ذاك 500 سنة واجبر فيها أولاد اخرين وامنات.

<sup>12</sup> وإلين عاد عندو أرفكشاد 35 سنة اجبر شالح. <sup>13</sup> وعاش أرفكشاد عاكب ذاك 403 سنوات اجبر فيها أولاد اخرين وامنات.

<sup>14</sup> وإلين عاد عندو شالح 30 سنة اجبر عابر. <sup>15</sup> وعاش شالح عاكب ذاك 403 سنوات اجبر فيها أولاد اخرين وامنات.

<sup>16</sup> وإلين عاد عندو عابر 34 سنة اجبر فالح. <sup>17</sup> وعاش عابر عاكب ذاك

430 سنة اجبر فيها أولاد آخرين وامنات.  
18 وإلين عاد عندو فالق 30 سنة اجبر رعو. 19 وعاش فالق عاكب ذاك  
209 سنوات اجبر فيهم أولاد آخرين وامنات. 20 وإلين عاد عندو رعو 32  
سنة اجبر سروج. 21 وعاش رعو عاكب ذاك 207 سنوات اجبر فيها أولاد  
آخرين وامنات.

22 وإلين عاد عندو سروج 30 سنة اجبر ناحور. 23 وعاش سروج عاكب  
ذاك 200 سنة اجبر فيها أولاد آخرين وامنات.  
24 وإلين عاد عندو ناحور 29 سنة اجبر تارح. 25 وعاش ناحور عاكب ذاك  
119 سنة اجبر فيها أولاد آخرين وامنات.

26 وإلين عاد عندو تارح 70 سنة اجبر أبرام وناحور وهاران.  
27 وهذا سجل أولاد تارح: تارح اجبر أبرام وناحور وهاران، وهاران  
اجبر لوط. 28 ومات هاران سابك بوه تارح فلارض اللي اخلك فيها شور  
أور الكلدانيين. 29 واتعرس كل من أبرام وناحور وكان اسم أعيال أبرام  
ساراي واسم أعيال ناحور ملكة منت هاران اللي اجبر ملكة ويسكة.  
30 وكانت ساراي عاكر ما اتخلي التركية. 31 واكبط تارح ولو أبرام وول ولو  
لوط ول هاران وساراي أعيال ولو أبرام وامشاو فابلد من أور الكلدانيين  
واعدين ارض كنعان. يغير يلين لحكو حاران سكنو فم. 32 ومات تارح  
فحاران يلين كان عندو 205 سنوات.